

दिनांक : 10.02.2026

समय : 18.45 बजे

- उपमुख्यमंत्री अर वित्त मंत्री दिया कुमारी काल विधानसभा मांय राज्य रो माली साल 2026-27 रो बजट पेश करेलां
- गृहमंत्री अमित शाह साइबर अपराधां माथे काबू करण ने देश री हिफाजत सारू खास बताया-साइबर धोखाधड़ी ऊं जुड्या राष्ट्रीय सम्मेलन रो उद्घाटन कीनों
- सुप्रीम कोर्ट केंद्र सरकार ने देश रा न्यारा-न्यारा हलकां ऊं बच्चां रे लापता व्हेवण री घटनावां पाछे रा नेटवर्क री ठा करण रा हुकम दीनां
- प्रदेश रा हर जिला मांय नम भूमि ने विकसित करी जावेला-सिलीसेढ झील मॉडल वेटलेंड रा तौर ऊं विकसित व्हेलां

000

उपमुख्यमंत्री अर वित्त मंत्री दिया कुमारी काल संवारे 11 बज्यां विधानसभा मांय माली साल 2026-27 रो बजट पेश करेलां वे आज वित्त विभाग रा आला अहलकारां सागे मीटिंग कर र बजट फाइनल कीनों उपमुख्यमंत्री प्रेमचन्द बैरवा कह्यो के काल पेश कर्यो जावण वाळो बजट समाज रा हर तबका ने फायदो देवण वाळो व्हेलां

.....

विकसित राजस्थान बणावण री सोच माथे आधारित ई बजट ऊं जनता ने घणी उम्मीदां हैं सिरौही जिला रा लोगां ने उम्मीद है के ओ बजट हर तबका सारू फायदेमंद व्हेलां पाली रा आई-स्टार्ट प्रोजेक्ट कोऑर्डिनेटर **राजवीर** बजट मांय भणार्ई-लिखाई सागे तकनीक अर एआई रा बारा मांय खास ध्यान देवण री आस जतार्यीं बाड़मेर रा जोगेन्द्र हुड्डा बजट रे किसानां रो भलो करण वाळो व्हेवण री आस जतार्यीं

.....

आकाशवाणी समाचार जयपुर री ओर ऊं काल पेश कर्या जावण वाळा राज्य रा बजट रा तैत उप मुख्यमंत्री रा बजट भाषण रो आकाशवाणी ऊं संवारे 10 बज र 57 मिनिट ऊं सीधो प्रसारण कर्यो जावेलां बजट भाषण 1.00 बज्यां पाछे ई चालतो रेहवण री सूरत मांय दोपहरां पाछे 1 बज्यां आकाशवाणी जयपुर ऊं प्रसारित कर्यो जावण वाळो प्रादेशिक समाचार बुलेटिन बजट भाषण पूरो व्हेता ई प्रसारित कर्या जावेलां इण री मियाद पांच मिनट ऊं बधा र दस मिनट करी जावेला अर दोपहरां पाछे तीन बज्यां राजस्थानी मांय खास बजट बुलेटिन प्रसारित कर्यो जावेलां

000

गृह मंत्री अमित शाह कह्यो है के साइबर हिफाजत अबे देश री हिफाजत ऊं जुड गयी हैं वे आज नई दिल्ली मांय साइबर धोखाधड़ी रो सामो करण अर इण रा पारिस्थितिकी तंत्र ने खत्म करण रा बारा मांय राखी ज्या राष्ट्रीय सम्मेलन रा उद्घाटन जळसा मांय बोल रह्या हां वे कह्या के सरकार देश मांय साइबर अपराध खत्म करण सारू केई जतन कर रही हैं वे कह्यो के भारतीय साइबर अपराध समन्वय केंद्र -आई4सी साइबर अपराध रे खिलाफ खास मंच बण गयो हैं

.....

गृह मंत्री केन्द्रीय अन्वेषण ब्यूरो-सी बी आई री नुवी साइबर अपराध शाखा रो ई उद्घाटन कीनो अर गृह मंत्रालय रा राज्य साइबर अपराध समन्वय केंद्र डैशबोर्ड री ई सरुआत कीनीं ई मौके आज राष्ट्रीय सूचना विज्ञान केन्द्र री ओर ऊं जयपुर मांय जागरुकता कार्यशाला राखी ज्यी, जिण मांय समाज मांय इंटरनेट हिफाजत सागे, जिम्मेदार अर सकारात्मक तरीका ऊं काम लेवण रा बारा मांय जाग जगायी ज्यीं

000

लोकसभा मांय विपख री ओर ऊं लोकसभा रा महासचिव ने अध्यक्ष ओम बिरला रे खिलाफ अविश्वास प्रस्ताव रो नोटिस दियो ज्यो हैं नोटिस री जांच पाछे नियमां रे मुजब आगे री कार्रवाई करी जावेलां नोटिस माथे कांग्रेस, डीएमके, समाजवादी पार्टी, आरजेडी अर वामपंथी दलां समेत केई पार्टियां सही कीनी है, हालांकि तृणमूल कांग्रेस ई माथे दस्तखत नी कीना हैं

0000

प्रधानमंत्री किसान सम्मान निधि रा तैत सरकार निधि रा तैत 21 किशतां मांय चार लाख करोड़ रुपया ऊं बत्ती रकम किसानां रा खातां मांय भेजी हैं कृषि अर किसान कल्याण राज्य मंत्री रामनाथ ठाकुर आज लोकसभा मांय एक सवाल रा लिखित जवाब मांय आ जाणकारी दीनीं एक और सवाल रा जवाब मांय ग्रामीण विकास राज्य मंत्री कमलेश पासवान कह्यो के विकसित भारत—रोजगार अर आजीविका मिशन (ग्रामीण) कानून वी बी जी राम जी केवल मजूरी मुहैया करावण रो कार्यक्रम नी है बल्कि गांवाई हलकां मांय विकास ने तेज करण सारू बनायी ज्यो ढांचो हैं श्री पासवान कह्यो के ओ कानून गांवा मांय हर जरूरतमंद पिरवार ने एक माली साल मांय एक सौ दिन री बजाय सवा सौ दिन री मजूरी री गारंटी देवे हैं केंद्रीय मंत्री बतायो के तय मियाद मांय मजूरी मुहैया नी करावण री सूरत मांय मजूरां ने बेरोजगारी भत्तो देवण रो ई प्रावधान करी ज्यो हैं

000

सुप्रीम कोर्ट सरकार ने देश रा न्यारा—न्यारा हलकां ऊं बच्चां रे गम जावण री वारदातां पाछे किण ई नेटवर्क या राज्य—विशेष मांय खास समूह री मौजूदगी री ठा करण सारू कह्यो हैं न्यायमूर्ति बी.वी. नागरतना अर न्यायमूर्ति उज्ज्वल भुयान री पीठ एक गैर सरकारी संगठन कानी ऊं दायर जनहित याचिका माथे सुणवाई करता थकां ओ हुकम दीनीं अर्जी मांय केई राज्यां मांय लापता बच्चां री बधती तादाद माथे चिंता जतायी ज्यी हैं अदालत केंद्र सरकार ने सगळा राज्यां ऊं इण ऊं जुड़्या आंकड़ा भेळा करण सारू कह्यो अदालत कह्यो के बचायोड़ा बच्चां ऊं ऐडी वारदातां रा जिम्मेदार लोगां रा बारा मांय जाणकारी ली जा सके हैं

0000

मुख्यमंत्री भजनलाल शर्मा आज जयपुर रा आराध्य देव श्री गोविंददेव जी मंदिर परिसर ऊं कलश यात्रा ने रवाना कीनीं ईं मोके वे कह्यो के संत—महात्मा सनातन संस्कृति ने मजबूत कर र देश ने सही दिशा दे रह्या हैं वे नौजवानां ऊं संतां री सीख ने अपना र देश रा माथो ऊंचो करण वाळा रीति—रिवाज ने आगे बधावण री अपील कीनीं श्री शर्मा मंदिर मांय रीति—रिवाज सागे पूजा—अर्चना कर र प्रदेश री सुख—समृद्धि री कामना कीनीं ईं दौरान मुख्यमंत्री बाबा बस्तीनाथ महाराज रो मान कीनीं कार्यक्रम मांय विधायक देवी सिंह शेखावत समेत मोटी तादाद मांय जातरू मौजूद रह्यां

0000

प्रदेश रा हर जिला मांय कम ऊं कम एक नम भूमि यानी वेटलैंड ने न्यारा—न्यारा दौर मांय विकसित करी जावेलां आज जयपुर मांय शासन सचिवालय मांय राख्यी ज्यी राज्य आर्द्रभूमि प्राधिकरण री मीटिंग मांय शासन सचिव विजय एन ईं सारू जिला—वार लिस्टां बना र वां ने डिजिटल बणावण रा हुकम दीनां वे अलवर जिला री सिलीसेढ़ झील ने मॉडल वेटलैंड रा तौर ऊं विकसित करण रो हुकम दीनीं सिलीसेढ़ झील परिन्दां री 149 प्रजातियां रो बसेरो है अर सरिस्का टाइगर रिजर्व रा बफर ज़ोन मांय एक खास रामसर साइट हैं

000

भरतपुर रा जग प्रसिद्ध केवलादेव राष्ट्रीय उद्यान मांय सैलाणियां सारू खास थ्री—डी सेल्फी पॉइंट बणायी ज्यो है, जठे सैलानी परिंदां रा 'लाइफ साइज' मॉडल सागे फोटो खींच सकेलां म्हाणा भरतपुर खबरनवीस बतायो के सैलाणी वठे लाग्योड़ा क्यू आर कोड स्कैन कर र परिंदां रा बारा मांय विगतवार वैज्ञानिक जाणकारी तुरत ले सकेलां

000

राज्य मांय लगाया जा रह्या ग्रामोत्थान शिविरां ऊं गांव वाळां अर ढांढा—ढोर राखण वाळां ने खूब फायदो मिल रह्यो हैं सिरोही जिला रा सांतपुर अर दत्ताणी गिरदावर सर्किलां मांय लगायी ज्यो शिविरां मांय खेती—बाड़ी, पशुपालन अर डेयरी समेत न्यारा—न्यारा महकमां री ओर ऊं योजनावां री जाणकारी दीरीजीं जिला मांय हाल तांई आं शिविरां रे ज़रिए करीब चालीस हजार किसानां ने सहकारी कर्ज अर इतरा ही पशुपालकां ने जिनावरां रा ईलाज रो फ़ायदो मिल्यो हैं

000

पशुपालन अर देवस्थान मंत्री जोराराम कुमावत आज पाली जिला रा सुमेरपुर री सरकारी जनजाति आवासीय स्कूल मांय विद्यार्थियां सागे बातचीत कर र वां ने मिलण वाळा सुबीतां री जाणकारी लीनीं श्री कुमावत कह्यो के राज्य सरकार 17 करोड़ रुपया रा खर्च ऊं ईं स्कूल रो नुवो भवन बणा रही हैं वे भणाई—लिखाई रो काम आवता शैक्षणिक सत्र ऊं नुवा भवन मांय करावण रो भरोसो दिरायो

000

राज्य मांय घणखर ठोडां पारो चढबा ऊं सदीं ऊं थोडी साता मिली है, हालांकि इण ऊं किसानां री चिंता बध रही हैं भीलवाड़ा मांय कृषि विभाग रा संयुक्त निदेशक किसानां ने गेहूं अर जौ री साखां ने गर्मी ऊं बचावण सारू तुरत पाणत री राय दीनी हैं जाणकारां रे मुजब टेमसर पाणत ऊं पौधा ने नमी मिलेला अर उपज माथे असर नी पड़ेलां

0000

बालोतरा ज़िला मांय प्रधानमंत्री मातृ वंदना योजना रा तैत हाल तांई करीब 77 फीसदी लक्ष्य हासिल कर लियो ज्यो हैं महिला अर बाल विकास विभाग रा उप निदेशक नितिन गहलोत बतायो के जिला मांय ई रो फायदो लेवण सारू छह हजार चार सौ ऊं बत्ती महिलावां नाम मंडा दीना हैं जिला मांय बालोतरा ब्लॉक अस्सी फीसदी ऊं बत्ती उपलब्धि सागे अव्वल हैं

000

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम **“मन की बात”** मांय 22 फरवरी ने विचार बतावेलां आ ई कार्यक्रम री 131वीं कड़ी व्हेलां ई सारू आप ई मुफ्त नम्बर 1800-11-7800 माथे राय दे सको हों ई रे अलावा नरेन्द्र मोदी एप अर माय जीओवी ओपन फोरम रे ज़रिए ई 20 फरवरी तांई विचार भेज्या जा सके हैं

0000